



## 'n Feit is 'n Feit

'n Feit is 'n feit, sê ons. 'n Mens kan nie daar verby kom nie. As jy feite ignoreer, dink jy nie heeltemal nugter nie. Jy loop met jou kop in die wolke en dan, onverwags, kom die slag...

### Met die feite omgaan

Dit gaan oor hoe jy met die feite omgaan. Neem byvoorbeeld ernstige siekte. Dit kom jou oor soos 'n donderslag uit die helder hemel. Die berig van die dokters laat geen ruimte nie; dit is hopeloos.

Dan sê ons dit kan enigiemand oorkom. Dis waar. Of jy gelowig is of ongelowig, die feit van die diagnose maak nie verskil nie: die einde van jou lewe staar jou in die gesig. En nou?

### 'n Wêreld se verskil

Die twaalf verspieders van Numeri 13 en 14 het 'n eendersluidende verslag gebring, maar daar word totaal verskillende gevolgtrekkings uit die feite gemaak. Tien het met oë vol ongeloof gekyk. Twee het gekyk met die bewussyn dat God 'n belofte gegee het. Wat 'n wêreld se verskil het die interpretasie van daardie feitelike verslag nie onder die mense van destyds teweeggebring nie! Ongelooflik! Ons moet verstaan: 'n feit is 'n feit, maar in watter lig word dit beskou?

### Vertrou

Dit gaan oor jou vertrou op God. Baie dikwels raak ons vanweë die feite die spoor byster. Dit is waar, ons is mense, gewone mense, maar in watter lig gaan ons staan? Die Here het ons baie dinge beloof, maar daar staan nêrens 'n belofte dat geen kwaad ons sal oorkom nie. Wanneer alles nie gaan soos jy dit wil hê nie, sê ons al te gou: waarom doen God dít?

### Bemoediging van Bo

Ek het in Jesaja 'n paar woorde teëgekomp wat ek graag wil deurgee. Nadat die kwaad van die volk van God duidelik geblyk het, lees ons aan die begin van Jesaja 43 die omvang van God se genade:

*“Ek het jou by jou naam geroep; jy is myne!” “Wees nie bevrees nie.”*

En dan:

*“As jy deur die water gaan, is Ek by jou; en deur die riviere — hulle sal jou nie oorstrom nie; as jy deur vuur gaan, sal jy jou nie skroei nie, en die vlam sal jou nie brand nie.”*

Dit sê God, ons Vader om Christus ontwil. Let wel dat die Here nie beloof dat ons nie deur water of vuur sal gaan nie. Hy sê nie dat ons niks sal oorkom nie. Hy sê: Ek is by jou. Hy sê: Ek sorg vir jou lewe en toekoms. Vertrou op my.

### Nogmaals: Omgaan met die feite

Water en vuur ... dit is die feite van ons lewe. Soms is dit berge. Ons kan meer beskrywings gee. Ons kan dit nie vermy nie, al wil ons hoe graag. En hoe baie van dié feite is daar nie in ons lewe nie. As dit nie in jou eie lewe is nie, kyk maar om jou rond. Wat doen jy daarmee? Wegkom kan jy nie. Verander ewemin. Wat op ons pad kom, moet ons aanpak en saamdra ons toekoms in. Sal ons vergeet dat die Here beloof het dat Hy by ons is en ons help dra? As jy met oë van ongeloof kyk, kan daar 'n soort berusting kom, óf opstand. Dit kan in die lewe van die gelowige ook gebeur. Ons weet dit maar al te goed. Dit is egter in alle omstandighede goed naby ons Vader. Waarom?

Omdat jy nie vrae hoef te hê oor die feite wat jou tegemoet kom nie? Omdat dit dan alles so helder en duidelik is? Meesal sal dit gewis nie so wees nie. Om naby ons Vader te wees, is vir ons goed omdat Hy dan by ons is en ons dra. Wat ook al gebeur, Hy sal jou nie laat omkom nie.

Aan die waarheid van die belofte hoef niemand te twyfel nie. Hy gaan immers altyd bo onself uit, maar Hy is soos sy Naam. Daarom begin vertrouwe by God en sy beloftes.

## **Bemoediging**

Vir hulle wat dit van Hom verwag straal die liefde van God ver bo die feite uit. Is dit moontlik op daarop te bou? Luister maar na mense wat ten spyte van baie teenspoed staande gebly het. Hulle het wel die feite deurgaen, maar die Here was by hulle en het uitkoms gegee. So is daar te midde van die harde feite baie bemoediging. Dit is kosbaar. Dit beteken om die lig van die Here te weerspieël. Ons weet: met die Woord van ons God kan ons baie bemoedig – en dit doen ongelooflik goed!

OW Bouwsma

© 2014

[www.christelikemedia.org](http://www.christelikemedia.org)